



Broj: 01-297/23
Vareš, 30.11. 2023. godine

Na osnovu člana 8. stav 3.alineja 37. Zakona o principima lokalne samouprave u Federaciji BiH („Službene novine Federacije BiH“, broj: 49/06 i 51/09), te člana 22. Statuta Općine Vareš (broj: 01-162/12-prečišćeni tekst od 11.09.2012.godine), Općinsko vijeće Vareš na 30. sjednici održanoj dana 30.11. 2023.godine, d o n o s i:

ODLUKU

o uslovima i načinu držanja pasa, te načinu postupanja sa napuštenim i izgubljenim psima na području općine Vareš

I. OPĆE ODREDBE

Član 1.

- (1) S ciljem sprečavanja i suzbijanja zaraznih bolesti i zaštite zdravlja životinja i bezbjednosti građana ovom Odlukom propisuje se način i uslovi držanja pasa, registracija i njihovo označavanje te postupanje sa napuštenim i izgubljenim psima, osnivanje higijenskog servisa i skloništa za životinje.
- (2) Određene odredbe Odluke ne primjenjuju se na službene pse koje u obavljanju svojih poslova koriste tijela državne uprave i druge pravne osobe (npr. policija, granična služba, zaštitari i sl.), pse osposobljene za pomoć osobama sa posebnim potrebama i invaliditetom (npr. vodiče slijepih i slabovidnih osoba), te pse tartufare i lovačke pse samo za vrijeme lova.

Član 2.

- (1) Pojedini pojmovi u ovoj Odluci imaju sljedeće značenje:
 - **izgubljena životinja**- je životinja koja je napustila vlasnika bez njegove volje i on je traži,
 - **napuštena životinja**- je kućna životinja koju je vlasnik svjesno napustio,
 - **opasne životinje** -su životinje koje su prema Pravilniku o držanju opasnih životinja (Službeni glasnik BiH , broj:27/10) definisane kao takve,
 - **imalac ili vlasnik životinje**- je fizičko ili pravno lice koje je vlasnik životinje, ili bilo koje drugo lice koje je stalno ili povremeno: vlasnik životinje; odgovorno ili zaduženo za životinju; odgovorno za čuvanje i kontrolu mlađe djece od 16 godina koja imaju životinju, odnosno koja se bave uzgajanjem, zaštitom, upotrebom, gajenjem, upravljanjem, obučavanjem, prevozom ili prodajom životinje,

adresa: Zvijezda 34, 71330 Vareš
identifikacijski broj: 4218285300002
depozitni račun Unicredit banka:
3380002210017420

tel.: 00387 32 848 100;
fax: 00387 32 848 150;
web: www.vares.info
e-mail: vares@bih.net.ba



- **pas lotalica** -je svaki pas koji nema vlasnika, nije obilježen mikročipom i zaveden u bazu podataka prema Zakonu o zaštiti i dobrobiti životinja,
- **sklonište za životinje**- su prostori u kojima se smještaju i zbrinjavaju (napuštene i izgubljene životinje) na daljnju brigu i moguće udomljavanje,
- **higijenski servis**- je služba za prikupljanje napuštenih, izgubljenih i uginulih životinja, koji osnivaju pravna lica u skladu sa odredbama ovog zakona,
- **eutanazija psa** -je poseban način usmrćivanja koje isključuje patnju i bol životinja,
- **ovlaštene veterinarske organizacije**- su veterinarska stanica, veterinarska ambulanta, veterinarska bolnica i veterinarska klinika.

II. USLOVI I NAČIN DRŽANJA PASA

Član 3.

- (1) Na području općine Vareš zabranjeno je držanje životinja u ulicama gradskog područja: Zvijezda, Put Mira, Čaršija, Franjići, Matijevići, Jušići, Benići (oko bivšeg silosa), Novakovići, Nikovac, Selište (do objekta S-I, S-II i S-III), Tirići (do kuće Islamovića), Stojkovići (do Bazena), Glavica (do groblja), Metalska, Majdanska (do objekta "Trokuća"), Perunska i Ljevarska.
- (2) Izuzetno od predhodnog stava dozvoljeno je držanje pasa, mačaka, ptica i dr. ukrasnih životinja, ukoliko se njihovim držanjem ne ugrožavaju susjedni korisnici stanova i objekata i ukoliko nisu ugroženi higijenski, sanitarni ili drugi uslovi gradskog prostora.
- (3) Služba za prostorno uređenje Općine Vareš može po prethodno pribavljenom mišljenju komunalnog i sanitarnog inspektora i u ostalim gradskim ulicama odobriti pojedinim domaćinstvima držanje životinja od bitnog interesa za egzistenciju domaćinstva i ako njihovim držanjem nisu ugroženi higijenski, sanitarni, komunalni i drugi uslovi življenja.

Član 4.

- (1) Imalac ili vlasnik životinje, zavisno od vrste, pasmine, starosti i fizioloških potreba, dužan je životinju:
 - hraniti i napajati prema njenim fiziološkim potrebama,
 - njegovati i osigurati joj zdravstvenu zaštitu,
 - smjestiti je u dovoljno prostora i osigurati joj odgovarajuće uslove za kretanje, ako je privezana ili zatvorena,
 - osigurati životinjama koje se drže u zatvorenim prostorima dovoljno svjetlosti, toplote, vlage, provjetravanje, higijenu prostora,
 - osigurati takav sistem nadzora nad životinjama koje se drže u zatvorenim prostorima da u slučaju nesreće imalac životinja može reagirati na propisan način,
 - ne izlagati životinju ekstremnoj toploti ili hladnoći,
 - osigurati životinji dovoljno kretanja,
 - fizičko lice kao posjednik psa, ne može biti mlađe od 18 godina.

Član 5.

(1) Pas se može držati u sljedećim prostorima:

- u stanu u stambenoj zgradi,
- u porodičnoj kući i dvorištu porodične kuće,
- zajedničkom dvorištu porodične kuće i dvorištu sa većim brojem porodičnih kuća u posebnom objektu (kućica ili boks), uz saglasnost svih suvlasnika porodične kuće, odnosno svih vlasnika porodičnih kuća.

Član 6.

- (1) U stambenoj zgradi pas se smije držati samo u dijelu koji pripada vlasniku (privatnom stanu) i to na način da se ne ometa kućni red i mir, te sigurnost ostalih stanara i suvlasnika zgrade.
- (2) Imalac ili vlasnik ne smije ostavljati psa u zajedničkim prostorijama koje služe zgradi kao cjelini (stubišta, ulazi, prostorije za smeće, terase i sl.).
- (3) Kretanje pasa po zajedničkim dijelovima zgrade, kao i čišćenje tih prostorija i prostora od onečišćenja koje napravi pas, zajednički utvrđuju suvlasnici zgrade, predstavnik etažnih vlasnika i upravitelj zgrade.
- (4) U objektima ili zgradama kolektivnog stanovanja nije dozvoljeno držanje pasa na balkonu, terasi ili lođi, te uvođenje pasa u liftove u trenutku kada lift koriste stanari i građani.
- (5) Prilikom korištenja lifta, stepeništa i hodnika stambene zgrade, pas mora biti na povodcu pod neposrednom kontrolom posjednika, te je potrebno da vlasnik psa izvrši čišćenje onečišćenja koje napravi pas.

Član 7.

- (1) Dvorište u smislu odredbi ove Odluke je preostali dio građevinske parcele ograđen ili neograđen, koji pripada stambenoj zgradi, odnosno porodičnoj kući ili većem broju porodičnih kuća.
- (2) Dvorište koje se nalazi uz površinu javne namjene i površinu u javnom korištenju, a u kome se drži pas, mora biti ograđeno.
- (3) Imalac ili vlasnik životinje dužan je osigurati njegovo držanje u porodičnoj kući i dvorištu porodične kuće na način na koji se, sukladno propisima o vlasništvu, poštuju prava vlasnika susjednih nekretnina.
- (4) Imalac ili vlasnik psa dužan je da obezbjedi za psa odgovarajući objekat (kućicu ili boks). Objekat za držanje pasa, mora biti udaljen najmanje tri metra od susjedne parcele odnosno od susjednog stambenog objekta.

Član 8.

- (1) Pas koji se drži u neograđenom dvorištu, vrtu ili sličnom zemljištu mora biti sigurno vezan lancem, na način da ne ometa kretanje i sigurnost građana ili mora biti smješten u kućicu ili

boks koji će spriječiti nekontrolirano kretanje psa, te osigurati da se životinja neće moći samostalno udaljiti i izaći na javnu površinu bez povodca, zaštitnih sredstava i nadzora.

- (2) Pas se može vezati oko vrata adekvatnom ogrlicom ili kaišem koji se ne usijeca u kožu i koji ne može dovesti do povreda.
- (3) Pas koji se drži u ograđenom dvorištu, ili drugom zemljištu ne mora biti vezan ukoliko ograda visinom i čvrstoćom osigurava sigurnost prolaznika i susjeda, a vlasnik ili imalac psa dužan je da na vidnom mjestu postavi vidnu tablu sa crtežom i natpisom koji ukazuje i upozorava na prisustvo psa u dvorištu, te mora imati ispravno zvono na ulaznim dvorišnim vratima.

Član 9.

- (1) Ukoliko se pojavi zarazna bolest ili znakovi na osnovu kojih se može posumnjati da je pas obolio ili uginuo od zarazne bolesti, imalac ili vlasnik je dužan odmah obavijestiti najbližu veterinarsku organizaciju, te zatvoriti životinju i držati je zatvorenu do veterinarskog pregleda, a nakon pregleda postupati prema naređenim uputama.
- (2) Imalac ili vlasnik psa koji je ugrizao ili povrijedio čovjeka dužan je odvesti psa na pregled u nadležnu veterinarsku organizaciju, te u slučaju tužbe i presude u korist oštećenog snosi troškove odštete.
- (3) Troškove pregleda snosi imalac ili vlasnik životinje.

Član 10.

- (1) Imalac ili vlasnik psa koji se o njemu ne može brinuti dužan je pronaći udomitelja, odnosno fizičko ili pravno lice koje će o njemu brinuti na propisan način ili ga predati skloništu za životinje, te snositi troškove boravka do udomljenja ili drugog načina zbrinjavanja životinje.

Član 11.

- (1) Imalac opasnog/potencijalno opasnog psa dužan je životinju držati u skladu sa propisima o zaštiti i dobrobiti životinja, veterinarstvu, zaštiti prirode, javnome redu i miru, te odredbama Pravilnika o držanju opasnih životinja („Službeni glasnik BiH“, broj: 27/10).
- (2) Opasan pas može biti bilo koja jedinka te vrste, porijeklom od bilo koje pasmine koja je ničim izazvana, napala čovjeka i nanijela mu tjelesne ozljede ili ga usmrtila, ničim izazvana napala drugog psa i nanijela mu teške tjelesne ozljede, uzgajana ili dresirana za borbe pasa ili zatečena u organiziranoj borbi s drugim psom, te pas pasmine terijera tipa *bull* koji ne potiče iz uzgoja iz člana 8. stav 1. Pravilnika o držanju opasnih životinja (*pit bull* terijer) i njegovi križanci.
- (3) Činjenicu da je pas opasan utvrđuje veterinarski inspektor ili ovlaštenu veterinar, po podnesenoj prijavi o ničim izazvanom napadu na čovjeka s nanesenim tjelesnim ozljedama ili usmrćenjem ili ničim izazvanom napadu na drugu životinju s nanesenim teškim tjelesnim ozljedama.

Član 12.

(1) Zabranjeno je:

- ubiti psa bez opravdanog razloga, nanositi mu bol, patnju ili povredu, mučiti psa i namjerno ga izlagati stresu i strahu,
- držati psa i postupati sa psom na način kojim se ugrožava zdravlje i sigurnost drugih životinja i ljudi,
- zanemarivati psa s obzirom na njegovu zdravlje, smještaj, ishranu i njegu,
- huškati psa na druge životinje ili ljude ili ih dresirati na agresivnost, obučavati psa za borbe, te organizirati borbe pasa,
- napuštati psa ili postupati na način kojim se omogućava bijeg psa;

III. KRETANJE PASA PO JAVNIM POVRŠINAMA I OBJEKTIMA JAVNE NAMJENE

Član 13.

- (1) Na javne površine mogu se izvoditi psi za koje imalac ili vlasnik posjeduje službenu ispravu/dokument o provedenim mjerama kojim se dokazuje da su prethodno uredno registrirani, čipovani, vakcinisani protiv bjesnila i tretirani protiv parazita u JP Veterinarskoj stanici Vareš, na povodcu i sa brnjicom, u skladu sa ovom Odlukom i pozitivnim zakonskim propisima.
- (2) Vlasnik ili imalac psa mora na javnom mjestu imati propisanu službenu ispravu/dokument, te istu pokazati na zahtjev nadležnog inspektora ili policajca.

Član 14.

- (1) Na području naseljenih dijelova općine Vareš, imalac ili vlasnik je dužan voditi psa na uzici koja odgovara veličini i snazi psa, tako da ne ugrožava ličnu sigurnost ljudi i samih životinja, njihovo kretanje, te redovno odvijanje prometa.
- (2) Psi koji su zbog urođenih svojstava i agresivnog instinkta opasni za sigurnost ljudi, a posebno dobermani, američki stafordski terijeri, bullterijeri, pitbull terijeri, rotvajleri, doge, njemački i belgijski ovčari, japanski borilački psi, šarplaninci moraju se na području iz stava 1. ovog člana voditi na uzici, koja ne može biti duža od jednog metra obavezno s brnjicom.
- (3) Psi malog i srednjeg rasta (visine do 40 cm), kao i drugi psi starosti do 4 mjeseca, mogu se pod nadzorom vlasnika izvoditi na povodcu dužine do 3 metra i bez zaštitne brnjice, osim ako predstavljaju opasnost po okolinu u skladu sa posebnim propisima.

Član 15.

- (1) Psima koji se kreću na povodcu zabranjeno je kretanje na javnim površinama, gdje je to posebnim znakom zabranjeno (znak sa prekrštenim likom psa).
- (2) Nadležno JKP Vareš d.o.o je dužno da na osnovu rješenja Službe za prostorno uređenje postavi vidne oznake na kojima je naznačena zabrana slobodnog kretanja pasa.

Član 16.

- (1) Zabranjeno je:
 - šišanje pasa na javnim površinama, pojenje pasa na javnim česmama i bunarima namjenjenim za vodosnabdijevanje građana,
 - samostalno zbrinjavanje i hranjenje pasa lotalica na javnim površinama u blizini škola, vrtića, bolnica, javnih ustanova te zajedničkim prostorijama, dvorištima i sl.,
 - ostavljanje leševa uginulih pasa na javnim površinama, šumskim površinama i kanalima i na poljoprivrednom zemljištu,
 - ukopavanje uginulih pasa van mjesta određenog za tu svrhu
 - dovođenje i napuštanje pasa na područje općine Vareš sa područja drugih općina.

Član 17.

- (1) Imalac ili vlasnik psa dužan je pri svakom izvođenju na javnu površinu općine Vareš , nositi pribor za čišćenje fekalija i očistiti svaku površinu koju njegova životinja onečisti na bilo koji način.
- (2) Fekalije se odlažu o označene kante postavljene na javnim površinama. O postavljanju i održavanju opreme za odlaganje fekalija pasa, stara se JKP „Vareš“ d.o.o.

IV. POPIS, CIJEPLJENJE, REGISTRACIJA I OZNAČAVANJE PASA

Član 18.

- (1) Imalac ili vlasnik psa je dužan da u skladu sa ovom Odlukom i drugim važećim propisima izvrši cijepljenje/vakcinisanje, registrovanje i označavanje/čipovanje psa.
- (2) Zabranjeno je držati psa koji nije cijepljen/vakcinisan, koji nije upisan u registar/upisnik pasa i koji nije označen/čipovan u skladu sa ovom odlukom i propisima o veterinarstvu.
- (3) Imalac ili vlasnik psa mora imati propisanu službenu ispravu/dokument o upisu/registraciji i čipovanju psa, te vakcinaciji psa protiv bjesnila.
- (4) Registracija pasa vrši radi provođenja mjera propisanih Zakonom i ovom Odlukom, a naročito radi sprečavanja bjesnoće i drugih zaraznih bolesti.
- (5) JP Veterinarska stanica Vareš će imaću izdati službenu ispravu/ dokument.

Član 19.

- (1) Imalac ili vlasnik psa dužan je voditi brigu o njegovom zdravlju, te psa redovno cijepiti protiv bjesnila i drugih zaraznih bolesti.
- (2) Psi stariji od tri mjeseca moraju jednom godišnje biti cijepljeni protiv bjesnila, s tim da između dva cijepljenja ne smije proteći više od 12 mjeseci.

- (3) Imalac ili vlasnik psa mora omogućiti zaštitno cijepljenje protiv bjesnila psa koji tokom godine navrší tri mjeseca u roku od 14 dana od dana kada napuni tri mjeseca, a novonabavljenog psa koji nije ranije cijepljen protiv bjesnila, u roku od 14 dana od dana njegove nabavke.
- (4) Troškove i naknade za veterinarsko-zdravstvene preglede, cijepljenja i druge zaštitne mjere snosi imalac psa.

Član 20.

- (1) Imalac ili vlasnik psa dužan je registrirati pse u roku od sedam dana od dana sticanja vlasništva, odnosno odjaviti psa u slučaju svakog gubitka posjeda životinje (nestanka, prodaje, darovanja, uginuća i sl.) u roku od sedam dana od nastalog događaja nadležnoj veterinarskoj stanici koja vodi registar pasa.
- (2) Nabavku mladunčeta imalac ili vlasnik mora prijaviti najkasnije do napunjenog četvrtog mjeseca njegove starosti.
- (3) Nadležna veterinarska stanica JP Vareš za upisivanje pasa u registar vodi evidenciju o cijepljenim/vakcinisanim i označenim/čipovanim psima, te izdaje potrebne službene isprave/dokumenta.
- (4) Veterinarska stanica JP Vareš obavezna je dostaviti sanitarnom inspektorom postojeću evidenciju kao i redovne tromjesečne izvještaje o registraciji.

Član 21.

- (1) Svi psi koji se nalaze na području općine Vareš moraju biti identifikovani i evidentirani u skladu sa Pravilnikom o identifikaciji i vođenju evidencije pasa, mačaka i pitomih vretica u Bosni i Hercegovini („Službeni glasnik BiH“, broj: 96/16), a za pravovremenu identifikaciju odgovoran je imalac ili vlasnik psa.
- (2) Psi podliježu identifikaciji postavljanjem mikročipa u roku od sedam dana od dana prvog sticanja vlasništva, dok je identifikacija za pse koji ne mijenjaju vlasnika obavezna nakon navršena tri mjeseca starosti, a najkasnije prilikom prvog cijepljenja protiv bjesnila.
- (3) Identifikaciju pasa obavlja JP Veterinarska stanica Vareš .
- (4) Nije moguće sprovesti bilo kakvu veterinarsku intervenciju, osim intervencije prve pomoći ukoliko pas nije prethodno identifikovan mikročipom.
- (5) Troškove registracije psa snosi vlasnik.

V. KONTROLA RAZMNOŽAVANJA PASA

Član 22.

- (1) Imalac ili vlasnik psa je dužan osigurati kontrolu razmnožavanja psa, te mora onemogućiti i spriječiti svako nekontrolisano i neplanirano razmnožavanje pasa.
- (2) Prilikom kontrole razmnožavanja psa, imalac ili vlasnik je dužan voditi računa o broju potomaka psa radi osiguranja prostornih i drugih uslova držanja u skladu sa propisima o veterinarstvu, zaštiti i dobrobiti životinja, te ovom odlukom.
- (3) Kontrola razmnožavanja pasa provodi se:

- preventivnim djelovanjem (sterilizacija i kastracija životinja)
- kontrola kretanja i vrijeme tjeranja ženki
- upotreba veterinarskih sredstava.

(4) Poslove preventivnog djelovanja i upotrebe veterinarskih sredstava iz stava 3.ovog člana obavlja JP Veterinarska stanica Vareš.

(5)Troškove sterilizacije snosi vlasnik, dok se troškovi trajne sterilizacije za napuštene pse finansiraju iz budžeta općine Vareš ili drugih izvora finansiranja (donacije, pokloni) osim ako je pronađeni pas označen pa je moguće pronaći vlasnika i vratiti psa.

VI. POSTUPANJE SA NAPUŠTENIM I IZGUBLJENIM PSIMA, TE PSIMA LUTALICAMA

Član 23.

- (1) Hvatanje, sakupljanje, transport, smještaj i zbrinjavanje napuštenih i izgubljenih pasa, pasa koji se kreću javnom površinom bez nadzora posjednika, te pasa lualica, osiguravaju zaposleni u higijenskom servisu i skloništu za životinje, kojeg u skladu sa Zakonom o zaštiti i dobrobiti životinja, osniva fizičko ili pravno lice, ili općina ili kanton.
- (2) Hvatanje, sakupljanje, transport, smještaj i zbrinjavanje napuštenih i izgubljenih pasa, pasa koji se kreću javnom površinom bez nadzora vlasnika, te pasa lualica, obavlja se savremenim metodama, na human način i bez zlostavljanja, uz primjenu odgovarajuće opreme i prevoznih sredstava, a u skladu sa propisima o zaštiti i dobrobiti životinja i veterinarstvu.
- (3) Postupanje sa psima smještenim u sklonište (sterilizacija, identifikacija,adekvatan smještaj i ishrana) provodi se u skladu sa Zakonom o zaštiti i dobrobiti životinja, te propisima o radu higijenskog servisa i skloništa za životinje.

Član 24.

- (1) Imalac ili vlasnik izgubljenog psa dužan je skloništu za životinje bez odlaganja prijaviti nestanak životinje, a najkasnije u roku od 48 sati od dana nestanka.
- (2) Ako imalac ili vlasnik psa ne prijavi nestanak iz stava 1. ovog člana, smatra se da je napustio životinju.
- (3) Pronalazač napuštenog ili izgubljenog psa dužan je o nalasku obavijestiti sklonište za životinje, te pružiti životinji odgovarajuću pomoć do vraćanja posjedniku ili do smještanja u sklonište.
- (4) Imalac ili vlasnik napuštenog ili izgubljenog psa dužan je nadoknaditi svaku vrstu štete koju poćini pas od trenutka nestanka ili napuštanja do trenutka vraćanja posjedniku ili odgovarajućeg zbrinjavanja.
- (5) Psi bez vlasnika moraju biti primljeni u sklonište, veterinarski obrađeni te ukoliko nema adekvatnog smještaja psi se vraćaju u prvobitno stanište.
- (6) Ako je pronađena divlja životinja, higijenski servis obavezan je najbližem lovaćkom društvu podnijeti zahtjev za njeno vraćanje u prirodu ako je to moguće, ili u suprotnom, životinja se predaje najbližem zoološkom vrtu koji je opremljen za njeno primanje. Ukoliko ni zoološki vrt nije u mogućnosti da primi životinju, ona se eutanizira.

Član 25.

(1) U sklonište za životinje smještaju se psi u skladu sa propisima o zaštiti i dobrobiti životinja i veterinarstvu, i to:

- izgubljeni psi do vraćanja vlasniku,
- napušteni psi kojima se ne može utvrditi vlasnik, te psi lualice,
- psi koji se kreću javnim površinama bez nadzora vlasnika do vraćanja vlasniku,
- psi kojima imalac ili vlasnik ne može osigurati uvjete držanja u skladu s njihovim potrebama do udomljenja ili drugog načina zbrinjavanja pasa.
- troškove hvatanja, transporta, smještaja i zbrinjavanja životinja iz stava 1. ovog člana snosi vlasnik životinje ukoliko je poznat ili se njegov identitet naknadno utvrdi, a u protivnom navedeni troškovi se podmiruju iz budžeta općine i drugih izvora finansiranja (donacije, pokloni).

Član 26.

(1) Eutanazija/usmrćivanje psa se provodi u skladu sa odredbama Zakona o zaštiti i dobrobiti životinja.

(2) Ako se radi o kućnom ljubimcu, troškove eutanazije snosi imalac ili vlasnik, a ako se radi o psima lualicama/napuštenim životinjama troškovi padaju na teret budžeta općine.

Član 27.

(1) Općina će u skladu sa važećim propisima koji tretiraju oblast zaštite i dobrobiti životinja, poticati razvoj svijesti građanima o značaju pružanja zaštite i dobrobiti životinja.

VII. KAZNENE ODREDBE

Član 28.

(1) Fizičko lice će se kazniti novčanom kaznom u iznosu od 100,00 KM , odgovorno lice u pravnom licu u iznosu od 500,00 KM, a pravno lice će se kazniti u iznosu od 1.000,00 KM koje prekrši član 13. (stav 2.), 14.,15.(stav 1),17. (stav 1.) ove Odluke.

(2) Fizičko lice će se kazniti novčanom kaznom u iznosu od 300,00 KM, odgovorno lice u pravnom licu u iznosu od 1.000,00 KM,a pravno lice će se kazniti novčanom kaznom u iznosu od 2.500,00 KM koje prekrši član 5.,6.,7.,8.,9., 16. ove Odluke.

VIII. PROVOĐENJE I NADZOR

Član 29.

(1) Provođenje odredbi ove Odluke vrše Službe za upravu Općine Vareš, JP Veterinarska stanica Vareš, preduzeće nadležno za upravljanje i održavanje zajedničkih dijelova i uređaja zgrade, JKP Vareš d.o.o., svako u okviru svoje nadležnosti.

- (2) Inspekcijski nadzor nad provođenjem odredbi ove Odluke vrše općinska komunalna i sanitarna inspekcija, eko policija, te kantonalna veterinarska inspekcija svako u okviru svoje nadležnosti.
- (3) Policijski službenici također su, u granicama svojih ovlasti, na zahtjev nadležne komunalne, sanitarne ili veterinarske inspekcije, dužni osigurati pomoć pri provođenju inspekcijskog nadzora postupanja.

Član 30.

- (1) Prilikom vršenja nadzora nad poštivanjem odredbi ove Odluke nadležni inspektori imaju sljedeća prava i obaveze:
 - da narede izvršenje obaveza utvrđenih ovom Odlukom i poduzimaju preventivne, korektivne i represivne mjere i radnje izdavanjem usmenih ili pisanih naređenja ili upozorenja na licu mjesta ili naknadno po saznanju za počinjenu nepravilnost ili prekršaj,
 - da donose rješenja u pisanoj formi radi otklanjanja nepravilnosti u skladu sa Zakonom o organizaciji organa uprave u Federaciji BiH i Zakonom o upravnom postupku,
 - na licu mjesta izreknu novčanu kaznu prekršajnim nalogom,
 - podnesu zahtjev za pokretanje prekršajnog postupka,
 - podnesu krivičnu prijavu, ukoliko je određeno postupanje predviđeno kao krivično djelo posebnim zakonom,
 - da poduzimaju i druge mjere za koje su ovlašteni posebnim propisima.
- (2) Protiv rješenja nadležnog općinskog inspektora donesenog u pisanoj formi može se izjaviti žalba u roku od 8 dana od dana prijema rješenja.
- (3) Žalba se podnosi Drugostepenoj upravnoj komisiji Općinskog vijeća Vareš.

Član 31.

- (1) U slučaju kad jedan organ nije ovlašten postupati, bez odlaganja će u pismenoj formi ili usmenoj uz sačinjavanje službene zabilješke obavijestiti drugi nadležni organ o saznanjima koje ima.

IX. PRIJELAZNE I ZAVRŠNE ODREDBE

Član 32.

- (1) Svi imaoци ili vlasnici pasa na području općine Vareš biti će upoznati sa odredbama ove Odluke, te su dužni njihovo držanje uskladiti sa istom u roku od 60 dana od dana stupanja na snagu ove odluke.

Član 33.

- (1) Sklonište za životinje i higijenski servis iz člana 24. stav 1. ove Odluke moraju se osnovati u roku od šest mjeseci od dana stupanja na snagu ove Odluke.
- (2) Do osnivanja skloništa i higijenskog servisa, općina Vareš će u saradnji sa Udruženjem za zaštitu životinja „Žučo“ regulisati problem zbrinjavanja pasa lotalica, te poduzimati aktivnosti u vezi kastracije, sterilizacije i obilježavanja napuštenih pasa, a naročito pasa lotalica.

Član 34.

- (1) Problematika dovođenja pasa lotalica sa područja drugih općina iz člana 17. stav 5. ove Odluke, rješavati će se na način da pri pojavi novog psa lotalice u Varešu i njegove identifikacije, ukoliko je obilježen ušnom markicom, veterinarska stanica Vareš utvrdi da navedeni pas pripada drugoj općini, ili Udruženju ili fizičkoj osobi sa područja druge općine biti će poduzete aktivnosti povratka psa na njegovo primarno stanište.
- (2) PS Vareš će u saradnji sa Općinom Vareš pojačati kontrole vozila koja bi mogla prevoziti pse (pretežno subotom-pijačni dan).

Član 35.

- (1) U predmetnoj Odluci korišteni su pojmovi čije značenje je utvrđeno članom 2. Zakona o zaštiti i dobrobiti životinja.

Član 36.

- (1) Ova Odluka stupa na snagu osmog dana od dana objavljivanja na oglasnoj tabli Općine Vareš.

**PREDSJEDAVAJUĆA
OPĆINSKOG VIJEĆA**

Mahira Brkić

Odluka objavljena na oglasnoj tabli Općine Vareš 01.12. 2023. godine.

OPĆINSKI NAČELNIK

Zdravko Marošević

O b r a z l o ž e n j e

I. Pravni osnov za donošenje Odluke

Pravni osnov za donošenje Odluke o uslovima i načinu držanja pasa, te načinu postupanja sa izgubljenim i napuštenim psima sadržan je u odredbama:

- 1. Zakon o principima lokalne samouprave („Službene novine Federacije BiH“, broj: 49/06 i 51/09):** Jedinica lokalne samouprave ima vlastite nadležnosti ustanovljene ustavom i zakonom, i ima pravo baviti se pitanjima od lokalnog značaja koja nisu isključena iz njene nadležnosti, niti dodjeljena u nadležnost neke druge vlasti na osnovu ustava i zakona. U vlastite nadležnosti jedinice lokalne samouprave pored ostalog spada poduzimanje mjera za osiguranje higijene i zdravlja kao i zaštita životinja (**član 8**).
- 2. Statut Općine Vareš (Prečišćeni tekst), broj: 01-162/12 od 11.09.2012. godine:** Općinsko vijeće u okviru svoje nadležnosti donosi odluke i druge opće akte kojima uređuje pitanja iz samoupravnog djelokruga Općine Vareš (**član 22**).
- 3. Odluka o komunalnom redu, broj: 01-100/10 od 05.05.2010.godine, Odluke o izmjenama i dopunama Odluke o komunalnom redu, broj: 01-56/18 od 28.03.2018.godine i Odluke o izmjenama Odluke o komunalnom redu, broj: 01-127/21 od 29.06.2021.godine:** Zabranjeno je držanje životinja u ulicama gradskog područja: Zvijezda, Put Mira, Čaršija, Franjići, Matijevići, Jušići, Benići (oko bivšeg silosa), Novakovići, Nikovac, Selište (do objekta S-I, S-II i S-III), Tirići (do kuće Islamovića), Stojkovići (do Bazena), Glavica (do groblja), Metalska, Majdanska (do objekta "Trokuća"), Perunska i Ljevarska.
Izuzetno od predhodnog stava dozvoljeno je držanje pasa, mačaka, ptica i dr. ukrasnih životinja, ukoliko se njihovim držanjem ne ugrožavaju susjedni korisnici stanova i objekata i ukoliko nisu ugroženi higijenski, sanitarni ili drugi uslovi gradskog prostora (**član 100**).
Služba za prostorno uređenje Općine Vareš može po prethodno pribavljenom mišljenju komunalnog i sanitarnog inspektora i u ostalim gradskim ulicama odobriti pojedinim domaćinstvima držanje životinja od bitnog interesa za egzistenciju domaćinstva i ako njihovim držanjem nisu ugroženi higijenski, sanitarni, komunalni i drugi uslovi življenja (**član 101**).
- 4. Zakon o zaštiti i dobrobiti životinja („Službeni glasnik BiH“, broj:25/09):** Sklonište za životinje osniva fizičko ili pravno lice, jedinica lokalne samouprave, općina, grad, kanton ili entitet. Nadležni upravni organ kantona, grada ili općine izdaje dozvolu za formiranje

skloništa za životinje, na osnovu uputstva koje propisuje nadležno ministarstvo, a na prijedlog Ureda, te vodi upisnik skloništa za životinje (**član 28.stav 4 i 5**).

Nadležni upravni organ kantona, grada ili općine izdaje dozvolu za formiranje higijenskog servisa za životinje na osnovu uputstva koje propisuje nadležno ministarstvo, a na prijedlog Ureda (**član 29.stav 4**).

Sklonište i higijenski servisi finansiraju se iz budžeta entiteta, kantona, gradova i općina te drugih vidova finansiranja (donacije, pokloni) (**član 30**).

Eutanazija životinja može se sprovesti ako:

- a) se životinja ne može izliječiti;
- b) životinja dostigla visoku starost i otkazuju joj osnovne životne funkcije;
- c) životinje boluju od neizlječive ili zarazne bolesti;
- d) je životinja opasna po okolinu;
- e) je životinja u agoniji.

Za slučajeve pod tačkama a) i b), o usmrćivanju odlučuje imalac životinje, po preporuci veterinar a za slučajeve pod tačkama c), d) i e) odlučuje veterinar (**član 14**).

5. **Zakon o komunalnim djelatnostima („Službene novine ZDK“, broj: 17/08):** Komunalna djelatnost individualne komunalne potrošnje u smislu ovog zakona je, pored ostalog, i higijenska, strvoderska i kafilerijska djelatnost. Komunalna djelatnost zajedničke komunalne potrošnje u smislu ovog zakona je pored ostalog i obavljanje kafilerijskih usluga (**član 3**). Pod obavljanjem kafilerijskih usluga podrazumjevaju se poslovi stalnog i sigurnog uklanjanja životinja, pasa lualica, lešina životinja, određenih nusproizvoda sa javnih površina i poslovi eutanazije životinja (**član 4. stav 17**).
6. **Zakon o veterinarstvu BiH („Službeni glasnik BiH“, broj: 34/02):** Imaoći i čuvari životinja imaju obavezu voditi računa o zdravstvenij zaštiti životinja i njihovoj dobrobiti i moraju ažurno voditi registar na imanju. Svako je dužan zaštititi zdravlje životinja, kao i zdravlje ljudi, od bolesti i infekcija, koje se prenose među životinjama i ljudima, kao i od posljedica ostataka štetnih materija u prehrambenim proizvodima (**član 4. stav 1. i 2**).
7. **Zakon o veterinarstvu Federacije BiH („Službene novine FBiH“, broj: 46/00):** Cijepljenje pasa, vođenje evidencije pasa te izdavanje službene isprave o tome vrše veterinarske organizacije. Troškove upisa pasa, obaveznog čipovanja i izdavanja službenih isprava snosi vlasnik životinje. Sadržaj i oblik registra pasa, podaci o obaveznom upisu i provedenim mjerama, kao i oblik obaveznog obilježja za pse jedinstveni su za područje Bosne i Hercegovine (**član 17**).

II. Razlozi donošenja Odluke

Na osnovu navedenog pravnog osnova može se konstatovati da su uslovi , način držanja i zaštita kućnih ljubimaca regulisani na različitim nivoima vlasti, u više Zakona i Pravilnika.

S tim u vezi ukazala se potreba za objedinjavanjem svih odredbi koje se odnose na dobrobiti i zaštitu životinja u jedan propis „Odluku o načinu držanja pasa, te način postupanja sa napuštenim psima i izgubljenim psima na području općine Vareš“ čime se jasno definišu nadležnosti vlasti, odgovornosti imalaca pasa te način postupanja sa psima lualicama.

Nakon evidencije i definisanja odgovornosti imalaca pasa u jedinstveni registar, imati će se jasan uvid u broju vlasničkih pasa, uginućima, darovanjima, način kontrole razmnožavanja na osnovu čega će se moći postupati u slučajevima nedovoljne brige vlasnika o psu i odnosa prema životnoj sredini.

Od stupanja na snagu Zakona o zaštiti i dobrobiti životinja nadležnim institucijama je zabranjena eutanazija osim u zakonom određenim slučajevima, što je rezultiralo povećanim brojem pasa lotalica na području općine Vareš. Prethodnih godina navedena problematika se djelimično rješavala Ugovorom između Općine Vareš i UG „Žučo“ o privremenom zbrinjavanju pasa lotalica.

Do danas na području općine Vareš nije osnovan higijenski servis niti sklonište za životinje, čija izgradnja iziskuje značajna financijska sredstva.

Psi lotalice stvaraju probleme ne samo radi svoje agresivnosti nego i sve većeg razmnožavanja, te migracije pasa iz jedne općine u drugu. Pored ugriza i straha koje izazivaju kod građana to pričinjava materijalne štete na zdravlje ljudi. Također prisustvo velikog broja pasa lotalica uzrokuje znatno onečišćenje okoline i javnih površina. Napuštene životinje mogu biti i prijenosnici zaraznih bolesti na ljude i druge životinje (najdominantnije su zoonozebjesnilo).

Kontrolom razmnožavanja (sterilizacija, kastracija) smanjiti će se populacija pasa, smanjiti agresivnost pasa što rezultira manji broj ugriza i napada na čovjeka čime će se moći prevenirati širenje zaraznih bolesti.

III. Javna rasprava

Na osnovu Zaključka Općinskog vijeća broj: 01-236/23 od 28.09.2023.godine kojim se prihvata Nacrt Odluke o uslovima i načinu držanja pasa, te načinu postupanja sa napuštenim psima na području općine Vareš, provedena je javna rasprava u trajanju od 30 dana. Svi prijedlozi, komentari i sugestije (pismeni i usmeni) objedinjeni su u izvještaju koji se nalazi u prilogu ovog materijala.

IV. Financijska sredstva za provođenje Odluke

Za provođenje Odluke potrebna su financijska sredstva (finansiranje rada skloništa za životinje i higijenskog servisa, i dr.). Da bi se navedeni problem sistemski rješavao, te eliminisali uzroci koji dovode do pojavljivanja velikog broja pasa lotalica, i način zbrinjavanja postojećih predlaže se Općinskom vijeću da usvoji Prijedlog Odluke o uslovima i načinu držanja pasa, te načinu postupanja sa napuštenim i izgubljenim psima na području općine Vareš.

PREDLAGAČ:

OPĆINSKI NAČELNIK

IZVJEŠTAJ

o provedenoj javnoj raspravi o Nacrtu Odluke o uslovima i načinu držanja pasa, te načinu postupanja sa napuštenim i izgubljenim psima na području općine Vareš

Općinsko vijeće je na 28. sjednici održanoj dana 28.09.2023. godine, donijelo Zaključak o prihvaćanju Nacrta Odluke o uslovima i načinu držanja pasa, te načinu postupanja sa napuštenim i izgubljenim psima na području općine Vareš, broj: 01-236/23 od 28.09.2023.godine. Nacrt Odluke je objavljen na oglasnoj ploči, web stranici Općine Vareš, Radio Bobovcu, te su pismenim putem obavješteni svi predstavnici mjesnih zajednica općine Vareš. Također, svim zainteresiranim licima je omogućen neposredan uvid u cjelokupnu dokumentaciju.

Prije održavanja javne rasprave zaprimljen je jedan pismeni podnesak od strane građanina općine Vareš, u kojem je iznio svoje prijedloge i sugestije na nacrt Odluke koji je sastavni dio ovog Izvještaja.

Na centralnoj javnoj raspravi, održanoj dana 01.11.2023. godine u sali Općine Vareš dati su sljedeći prijedlozi, sugestije i mišljenja:

- 1. Muris Čizmo** (predstavnik MZ Vareš Majdan): je postavio pitanje vezano za trenutni smještaj napuštenih pasa, a koji predstavlja problem za mještane Vareš Majdana, te da li postoji mogućnost izmještanja pasa sa navedene lokacije na drugu adekvatnu lokaciju.
- 2. Fata Rožajac** (Predstavnica JP Veterinarske stanice Vareš): istakla je važnost uključivanja nadležne veterinarske stanice u provođenje navedene Odluke, te da se jasnim utvrđivanjem identiteta pasa lotalica (ukoliko su označeni) može prevenirati problematika dovođenja pasa sa područja drugih općina.
- 3. Snježana Kokor** (Komunalno -građevinski inspektor): je sugerisala da se određene stavke Odluke koriguju i dopune (kretanje pasa po javnim površinama, kaznene odredbe, nadzor, prijelazne i završne odredbe) .

Određeni prijedlozi, sugestije uvršteni su u Prijedlog Odluke, te imajući u vidu navedeno i činjenicu da većina sudionika javne rasprave podržava donošenje predmetne Odluke i poduzimanje aktivnosti u cilju rješavanja ove problematike, predlaže se Općinskom vijeću donošenje Odluke o uslovima i načinu držanja pasa, te načinu postupanja sa napuštenim i izgubljenim psima na području općine Vareš.

**PREDLAGAČ:
OPĆINSKI NAČELNIK**

Zdravko Marošević